




Khale, chisang'i chosi chamenyela alala. Chamenyela  
mumulembe mumusiru. Buli esang'i yakholanga kimilimo  
kiayo mala khukhwilocha ta.

Biakhulia biaba bikali bibiola chisang'i chosi. Chisang'i  
chaba nende buli sisindu nisio chenya. Kumusiru  
kwachiumba alala. Mbao omusiku yesi yesi wolakho  
khuchisang'i echo tawe. Chisang'i chosi chamenya  
nende kumulembe. Enjofu yaba omwami wabwe.



Lubeka lulundi lwe kumusiru lwabao luluchi. Khuluchi emwalo, liabao litisi lititi. Buli busiele omwami Enjofu kakendanga mumusiru. Enjofu yakendanga khumanya kabali chisang'i nechimenyile bulayi mumusiru, yenya khubona chisang'i nechikhola kimilimo kiabwe. Chisang'i abele chamiliisia kumusiru po!

Lukanile, Enjofu yamemanga chisang'i chindala khumukongo. Lundi yang'onanga engila nio chisang'i chichindi chabirakho. Chisang'i chosi chasima omwami Enjofu. Enjofu yaba omwami omulayi. Chisang'i chafumianga Enjofu mumienya nelikho nebira.

*Omwami Enjofu, ewe niwe we kamani*

*Omwami Enjofu, ewe niwe omulayi*





Lubeka lulundi sinao, Iwabao lukoba. Enju yabao endayi.  
Lukoba olwo Iwaba mulumako lwe bimelwa. Bimelwa  
bikali biaba mumukunda. Lukoba olwo Iwaba lwo  
omundu.

Omundu yuno kamenya nende efamili yewe. Omundu  
yuno yeng'ene niye waba omumenyani we chisang'i.  
Chisang'i chingali abele chimumanyile. Chisang'i  
chachakhanga omundu yuno nende efamili yewe sikila  
abele bakenda khubikele bibili.

Omundu yuno yesi abele amanyile chisang'i chichindi.  
Karbonanga chisang'i narura mungo mwewe. Kataanga  
kamechi muluchi. Omundu yuno yesi kaakanananga  
nende chisang'i nayima kamatunda ke mumusiru.





Luluchi lwaba nende kamechi kamakwalafu. Khundulo khwe luluchi, khwabakho bunyasi bulayi. Bunyasi bwaba bulayi chindalo chosi. Bunyasi buno sabwomakho tawe yakhaba musimiyu. Chisang'i chingali abele chasima khukona omwo.

Enjofu nende balebe bewe basokanga muluchi. Enjofu nende balebe bewe basimanga khukhwinyaa mumechi ke kamatosi. Abulala Enjofu nende balebe bewe benyaanga mwitisi khukhwama subui paka akoloba.

Enjofu yaba omusale wo omundu. Busale buno nibwo bwakila Enjofu yafukilila omundu khumenyela khundulo khwe mumusiru. Buli busiele omwami Enjofu nekeniya omundu, omundu abele akiwelesia kamarofu.






Endalo ndala omwami Enjofu yakeniya omundu. Omundu kasangalila bukeni bwo omwami Enjofu. Omundu kawelesia omwami Enjofu bisasu bie kamarofu elie. Akoloba omundu kawelesia Enjofu kamarofu kamakali eyilile ching'ana chayo. Omwami Enjofu yasangala.

Chisang'i chauka khubona omwami Enjofu nekama mungo mwo omundu. Mbao esang'i yarebakho omwami Enjofu niyo kamila khubela buri.


Ching'ana cho omwami Enjofu abele chasima kamarofu. Ching'ana chenya kamarofu kakandi khukhwama khu papa wabwe. Omwami Enjofu abele selikho nende kamarofu kakandi tawe. Kamatore sakaba mumusiru tawe. Ching'ana chalila silo siosi. Mayi we chinjofu ching'ana keyendekhelela.



Asubui yarakho, Enjofu yabona Ekhima ebira. Chindalo echo, Ekhima sayamenyanga khumisala tawe.

“ Cha mungo mwo omundu omubolele akhuwelesie kamarofu ke babana base,” Omwami Enjofu yarumania. Ekhima yasila khukhase khatiti khari. Ekhima yesenda simbi nio omwami Enjofu ali.

“Omundu ali omubeyi niye. Alakhuwelesia kamarofu mala abukule kumusiru kwefwe,” Ekhima yaloma kalaa. Enjofu yabelela. Bwangu yayukha mala yasamba Ekhima liteki. Ekhima yakwa khumusala kwaba simbi. Khwamila endalo eyeyo Ekhima yachaka khumenya khumisala.



Omwami Enjofu kalanga Likhutu. Likhutu liaba omurumwa omusubilifu. Chindalo echo Likhutu liaba nende sikhoba siolaolu nga efubo.

“Cha mungo mwo omundu akhuwelesie bisasu bie kamarofu ke babana base,” Omwami Enjofu karuma Likhutu. Likhutu liasila lundi. Likhutu liaria sikholwa nisio omwami Enjofu alalikholela kabali alalomma bung’ali. Likhutu liamaya lialoma khumumilo kwe siisa.

“Omundu ali omulianga. Alakhuwelesia kamarofu mala akhunule kumusiru kwefwe,” Likhutu liachiba, Enjofu yabelela. Enjofu yachaka khusenasena Likhutu muburafu. Yabukula Likhutu chindalo chingali khuona. Likhutu nga liaona kumukongo kwekela kumuandalafu. Kumukongo kwaba nende kamakakambu khukhuola luno.





Omwami Enjofu kalanga Embichi. Embichi yaba esang'i ye liriana khukhila chisang'i chosi. Bise ebio Embichi yaba nende chisaya chindayi. Mbao kamenos kaba enje we chisaya che Embichi tawe.

“Cha mungo mwo omundu akhuwelesie bisasu bie kamarofu ke babana base,” Omwami karumania. Embichi yasila khubise bititi biri. Yesenda simbi nende liru lio omwami Enjofu mala yaloma kalaa.

“Omundu sali we khusubilwa tawe. Khale omundu kaba nende situti silayi nga sisiefwe sino. Omundu kaleka omwami wabwe mala bamutimania musituti. Omundu kenya khubukula kumusiru kwefwe,” Embichi yaloma. Enjofu yarafua. Yawucha kumusanga mala yapa Embichi. Yapa Embichi muchisaya nende amusie we kumusanga kwayo. Yakila kamenos ke Embichi kefumba mala kafutukha enje khukhuola luno.





Yaba akoloba. Omwami Enjofu yakanakana silo siosi. Yarengecha khukona tawe. Endalo yarakho asubui, kalanga Endemu munju yewe. Bise ebio Endemu yaba nende sikhoba sie kamayeye.

“Cha mungo mwo omundu akhuwelesie bisasu bie kamarofu ke babana base,” Omwami karumania. Endemu yesindukha khuulila erio.

Yabwarabwara sikhoba siewe sie kamayeye nende kumurwe. Endemu abele emumanyile omundu bulayi lukali. Endemu mala yaloma.


“Abele emenyile nende omundu.

Namubea. Omundu kabelela nenase nachayo alafunakaka kumurwe kwase. Alecha khubukula kumusanga kwoo. Lundi alabukula kumusiru kwefwe.”

Kamakuwa kano kabelesia Enjofu. Enjofu yaswenakila kumurwe kwe Endemu nende sikele siewe sibalayi.

Endemu yakhaka khukhwilukha. Enjofu yaswenakilila kumurwe mala kamayeye kosi kakhukhumukha karura khusikhoba sie Endemu. Khukhwamila ao sikhoba sie Endemu siaba simiufu.






Chisang'i chosi chaulila sikhola nisio omwami Enjofu yakholela Ekhima. Chisang'i chosi chamanya chili Ekhima emenyanga khumisala khungaki. Abele chabone nisio Enjofu yakholela Likhutu. Chamanya chili Likhutu lili nende sikhoba sie kamakakambu kamalume khumukongo. Chisang'i chosi chaulila nisio omwami kakholela Embichi. Chamanya chili Embichi eli nende kameno kafutikhile muchisaya. Abele chabone nisio Enjofu yakholela Endemu. Endemu nono eli nende sikhoba simiufu. Endemu nono yiyobulanga lisielo liayo abulala.


Chisang'i chakanana mubwikisa. Sachabolela Enjofu tawe. Sechenya omwami Enjofu amanye kumukanda kwabwe tawe. Charangisibwa nende Etalang'i. Chosi chafukilisiana chili omwami nalanga esang'i yosi yosi chilongakho.





Elomo yabwe yaba khukhwikisa mumusiru mala balole nisio Enjofu elakhola. Chamanya chili omwami Enjofu alalanga esang'i ekindi. Mbao esang'i yosi yosi yaba nende bulekhule bwe khucha simbi nende omwami Enjofu khuulila nisio aloma ta.

Ekhaniafu yasuta lulimi lwewe! “Ndacha simbi.” Ekhaniafu yaloma. Ekhaniafu yafukilila khukalukhana yikele erangi ye bisala, Omwami Enjofu seyamanya elomo eyeyo ye chisang'i ta.




Endalo yarakho, omwami kalanga Emboko. Emboko yaba omusikari omuyikinwa. Yalolanga silibwa sio omwami. Bise ebio chinjika chayo chaba nga che ekhafu. Yaba bulume khukabukhania ekhafu nende Emboko.

Emboko yaba omusikari omunyindafu. Emboko yatimaka bwangu khusilibwa sio omwami khurekeresia nisio Enjofu yenza Emboko ekhole.

Emboko nga yola, omwami kalaka,” Cha wo omundu akhuwelesie bisasu bie kamarofu ke babana base.” Emboko yasila mukhase khatiti.





“Omwami wase, endolanga omundu nakhulola efwe nali sinao. Kenya akhukalukhanie khwikele bakholi bewe. Lola nisio akholele ekhafu. Kenya khukhwicha khubukula chinjika che Sifaru,” Emboko yaloma.

“Alakhunula lukoba Iwefwe, kumusiru. Ararema kimisala kombekhele enju. Ararema kimisala kosie kamanda. Alarema kimisala kikele chikhu. Alalima kumusiru kuno mala abiale bimelwa.” Emboko yatasa.

Kamakhuwa kano kabelesia Enjofu. Enjofu yakunya Emboko khumurwe nende kumusanga kwewe. Sikholwa sino siakila chinjika che Emboko chefumba lubeka. Chinjika che Emboko chaifumba khukhuola luno. Emboko yebachila mumusiru yaloba busikari bwe khulola lukoba Iwe Enjofu.




Ekhaniafu yaulila kosi. Abele yekisile khulisafu angaki wo omwami Enjofu. Yacha ybolela chisang'i chosi kekholekhe. Atiti ari chisang'i chosi charura abundu nio chaba chikisile. Charangisibwa nende Etalang'i.

*Enjofu!Enjofu,  
khwalwile,  
khwalwile!*

*Khwaulile nisio  
wakholela  
Ekhima,*

*Lelo Ekhima  
emyenile  
khumisala.*



*Khwaulile nisio wakholela Likhutu,*

*Nono lili nende sikhoba siandalafu.*

*Khwaulile nisio wakholela Embichi*


*Lelo kameno kafutikhile muchisaya.*

*Khwaulile nisio wakholela Endemu,*

*Nono eli nende sikhoba simiufu.*

*Lelo yabele Emboko nono, khwalwile khwalwile kamabi koo.*





Omwami Enjofu kesindukha khubela luyoka lukali.  
Sekamanya luyoka lwamila waena ta. Yakhebulila niko  
Ekhima yakibolela. Yakhebulila niko Likhutu nende  
Embichi yakibolela. Yakhebulila niko kosi Endemu  
yakibolela.

Yakhebulila nisio Emboko yakibolela. Yapara eli omundu  
alikho kecha khubela kumusanga kwayo. Yamanya eli  
kamakuwa kabele kamabi. Yalanga babana bayo nende  
omukhaye wewe.

Bosi nende balebe bewe batima bwangu bwangu.  
Belukhila mumusiru atayi mala mukari lukali.



# GHRRRR!



Chisang'i chasangala. Ekhima yekhoya. Likhutu liosi liasangala. Embichi yosi yekhoya lukali. Emboko yekhoya yosi. Chisang'i chosi chaloba Enjofu khuba omwami wabwe.

Chisang'i chakanana lundi. Chosi charobora Etalang'i khuba omwami wabwe. Etalang'i aluno ari ali omwami we kumusiru.